

Promer Minister Eman: Air Aruba mester bira un Compania priva mescos cu antes

ORANJESTAD(AAN) -- Cu e injeccion nobo di 7 milyon florin e total di placa cu gobierno di Aruba a hinca den Air Aruba a yega of a pasa 100 milyon. Un suma masha grandi mes y

cu ta cuminsa preocupa hende, pasobra awor ta cuminsa puntra te unda ta sigui hinca placa den e compania aki. Minister Presidente Henny Eman a motiva e inversionnan den Air Aruba

bisando: "Nos ta sigui kere den futuro di Air Aruba. E tin un parti di mercado di transporte di turista cu ta importante y su contribucion ta grandi. Pero aki tambe ta conta cu for di punto di bista di bon maneho di e compania, no por sigui hinca placa aden sin yega na un solucion definitivo. Air Aruba ta un compania cu nos ta kere cu sigur tin derecho di existencia. Pesey no ta haci mas cu normal pa mantene na bida y dun'e halanan atrobe. Pero ta yega en berdad e momento cu mester evalua si y con ta sigui hinca placa den e compania aki. Ta pesey nos a fiha bon cla cu e financiamiento mester coriduci na un solucion definitivo pa e problemanan di e compania. Nos ta trahando duro hunto cu e directiva di Air Aruba y cu e grupo di trabao pa yega cynan."

Ta door di cada biaha a acudi na gobierno pa yuda e compania, cu gobierno a haya su mes asina envolvi den e compania cu en realidad el a bira doño di e compania. Pero esey no tabata ni ta e meta.

Pesey ta sigui busca inversionistanan pa compra e compania. Pa yuda haci esaki posibel gobierno ta usa tur medio legal y financiero posibel.

Segun expertonan, e compania tin derecho di existencia si mira e importancia di Air Aruba pa turismo. Air Aruba ta transporta un parti importante di e turistanan cu ta bin Aruba. Air Aruba ta emplea mas o menos 300 trabajador y ta duna trabao na hopi

mas pafor di e compania. Esakinan tambe ta motibo pa gobierno sigui yuda Air Aruba haya su solucion final. E mandatario a expresa: "Mester tene cuenta cu tur aspecto economico y laboral di e compania. E inversionnan cu nos a haci ta hopi, sigur si tene na cuenta cu originalmente y finalmente e ta y mester sigui ta un compania priva. E inversionnan ta halto si tene na cuenta e posicion di liquidez di gobierno. Apesar di esaki nos ta cumpli cu tur e re-

sponsabilidadnan di gobierno y sigui inverti den e compania aki alavez. Pero e meta final ta hustifica esaki. Esta di percura pa Air Aruba keda bula tranquil avor y den futuro".

Chollernan lo invadi Santa Cruz

ORANJESTAD (AAN): Un cantidad di reaccion a ricibi ayera riba e plannan di e Fundacion "A Roof on Proof" pa bin cu un Compleho special pa Choller, y cu ya caba decision a worde tuma pa traha esaki riba e tereno pabao di Sporthall na Santa Cruz.

Reaccionnan tabata fuerte ayera. Telefonnan di DIARIO tabata red-hot di lectornan cu kier a denuncia e acto aki, y sigur nan tur tabata contra e decision pa bin cune net na Santa Cruz.

Hasta un miembro di Partido Politico a emití un boletin pa asina critica e asunto aki severamente. Di otro banda, algun lector a expresa cu nan ta haya e idea di e Fundacion aki uno hopi bon.

E sorpresa pa tur hende sigur ta cu e noticia di Com-

pleho Moderno pa Chollernan na Santa Cruz ta un CHISTE DI 1 APRIL.

Esey si ta berdad! E "één april mop" aki un biaha mas ta creacion di e gran maestro di school Victor Lopez, kende pa 3 aña consecutivo ta suministrando DIARIO cu e chiste di prome April.

Por corda e prome di dje ainda, estae "Pista di Ski riba Yamanota", como tambe e "Ceramento di Tur carretera na Playa".

Pues, lo no bin NINGUN compleho di Choller na Santa Cruz.

COMPANIA PRIVA

Pa gobierno e compania mester bira uno priva atrobe, manera e tabata na comienso.

TELEFONNAN DI DIARIO
826747- FAX 828551

Guarda Costa Americano y su operacion na Aruba

ORANJESTAD(AAN) -- Manera DIARIO a publica, guarda costa Americano lo bin establece na Aruba y tur cos ta indica cu nan lo bay usa e puerto na Barcadera pa mara nan diferente barconan. E noticia aki a shock diferente hende den sentido cu nan no por kere cu tabatin un reunion secreto na Curaçao y cu guarda costa Americano lo bin Aruba.

E plan di guarda costa Americano ta pa establece na Aruba caminda lo haci nos avanan territorial limpi di trafico di droga.

Ultimo informacion cu DIARIO a ricibi encuanto e plan ta cu e nomber di e operacion ta: "Operacion 1 April". Esey ta nifica cu e noticia aki ta un chiste relaciona cu dia 1 di April.

2 APRIL, GOBIERNO A FORMA!!!

